



EDITORIAL

Saan a kumudrep ti rimat dagiti rebolusyonaryo a bitwen

Iti panagrambak ti Sangalubongan nga Aldaw ti Babbai iti Marso 8, padayawan ti Partido ti amin a babbai a timmakder iti kaskenan a lugar da iti rebolusyon. Isuda dagiti babbai a rebolusyonaryo, kadre, dagiti Nalabbaga a kumander ken mannakigubat, a dimmalyasat iti narigat a dana ti panaglaban, nagtignay ken nangidaulo ken ti adu ket nagiggem ti armas, tapno gun-oden ti natatayag nga arapaap para iti pannakawayawaya ti babbai ken intero nga umili.

Isuda dagiti saan a nagrukma wenno simmuko iti tengnga ti naiinget a labanan, napnuan rebolusyonaryo a pakinakem agingga iti maudi nga anges. Isuda dagiti rebolusyonaryo a bitwen nga agnanayon nga agrimat.

Kangatwan a pammadayaw ti ipapaay ti Partido kadagiti babbai a nangidaulo iti Partido, hukbo ti umili ken rebolusyonaryo a tignay. Padpadayawan ti Partido dagiti babbai a nagbalin a kagawad ti Komite Sentral a da Ka Maria Malaya (Myrna Sular-te), kalihim ti Panrehiyong Komite ti Northeast Mindanao ken Komisyon ti Mindanao; Ka Bagong-Tao (Wilma Tiamzon), kabuklan a kalihim ti Par-

tido; Ka Fiel (Eugenia Magpantay), kabuklan a kalihim ti Partido; Ka Elay (Helenita Parladis), kalihim ti Panrehiyong Komite ti Eastern Visayas; Ka Lalay (Aprecia Alvarez Rosete), kalihim ti Panrehiyong Komite ti Western Mindanao; Ka Sandy (Josephine Mendoza), maikadwa a kalihim ti Panrehiyong Komite ti Southern Tagalog ken Ka Kaye (Sandra Reyes), kagawad ti Komisyon ti Mindanao.

Saan met a malipatan ni Ka Concha Araneta Bocala, tagapagsarita ti National Democratic Front-Panay ken ginasut pay a babbai a nagserbi a kalihim, giyang pampulitika, kumander, mannakigubat, duktur ken nars ti masa, organisador, propagan-

dista, taguyod, manursuro ken tagasanay, pangiyangesan ti marikrikna ken tagabalakad ken dadduma pay.

Rambakan tayo ti nakadakkakel a naibingay ti babbai iti rebolusyon a Pilipino. Ipateg tayo ti ip-ipan da a sirib, regget ken taer a mangpabbabaknang ken mangpatpatibker iti dangadang ti umili. Iti tay-ak ti dangadang para iti umili ken para iti babbai, magungun-od da ti kapkapnekan da bilang tao ken kapatat dagiti lallaki. Lablabanan da ti kultura a patriyarkal a mangibilbilang kadakuada a nalupoy wenno nababbaba, ken inpamatmat da ti landok a pagtakderan.

Dagiti babbai a rebolusyonaryo ket namnama para iti minilyon a babbai nga agsagsagaba iti gimong a mangibilbilang kadakuada a nababbaba ken nakapkapsut. Pagwadan isuda para kadagiti babbai nga agsusweldo ti nababbaba ken makapatuok a paulit-ulit na trabaho; dagiti

agsuksukay ti daga iti talon ngem saan a maibilbilang a produktibo; dagiti awanan daga ken mapadpadisi manipud kadagiti aneutral a daga da; nakagalut iti panagtagibalay ken panagaywan ti asawa ken anak ngem limitado, nu adda man boses da iti bukod a pagtaengan; kadagiti saan a makaruk-at kadagiti managabusong a relasyon gapu iti buteng ken kinawanan bileg iti ekonomya; kadagiti napilitan nga agbanyaga iti sabali a pagilian tapno adda maipakan iti pamilya da; kadagiti makapadpadas ti diskriminasyon iti kasarian ken kadagiti biktima ti sekswal a panagabusong ken kinaranggag.

Bigbigen tayo ti naisangsangayan a kontribusyon da kas inna ken asawa iti panangbukel kadagiti rebolusyonaryo a pamilya ken relasyon, iti panangriing ken militante a panangitandudo kadagiti patakaran para iti proteksyon ti babbai, ubbing ken LGBT laban iti panaggundaway ken panangidadanes. Bigbigen tayo ti papel da iti panangingato ti kamulatan ti lallaki ken umili kanaig kadagiti usapin ti babbai, panangiyabante ti patas a panangibilang iti kasarian ken panangbukel ti natibker a sistema ti suporta para kadagiti kapada a babbai.

Ipatag tayo dagiti sakripisyo da,

ti panangtallikod iti kumportable a biag ken managimbubukod nga arapaap, ti panangibatur iti adu a kinari-gat iti gubat, ken nangruna ti napaut a pannakaisina iti bukod da nga anak. Iti laksid dagitoy, ti biag da iti dangadang ket napnuan ragsak ken regta. Saan a maibus dagiti istorya a nakaay-ayat, nakakatkatawa ken makapasangit a kapadasan dagiti babbai a makidangdangadang. Kas kadagiti naisangsangayan a sabong iti kabakiran, dungdungwen ken annadan isuda ti masa ken dagiti kadwa.

Iti sango ti kumarkaro a kinari-gat ken panagsagaba ti pinullo a milyon a pamilya iti tengnga ti krisis iti ekonomya nga ituntunda ti korapsyon ti rehimen Marcos, ken dagiti patakaran programa a kontra-ma-rigrigat ken maka-gangannaet a kapitalista, agtultuloy a maririing ti babbai kadwa ti intero nga umili, iti pagkasapulan a tumakder ken lumaban.

Kabilang dagiti babbai iti unaan dagiti mangmangged a sipapasnek nga agibangbangon kadagiti unyon ken nadumaduma a timpuyog da. Kabilang isuda kadagiti mangiyun-una iti panangirupir kadagiti arungaing ken kadawatan para iti nayon a sweldo, karbengan iti regular a trabaho

ken mas makatao a kundisyon iti panagtrabaho. Kabilang isuda kadagiti natured a tumaktakder iti panangsangong iti bukis a kapitalista, kadagiti armado a maton na ken pasista nga ahente ti estado.

Adda da iti unaan ti masa a nakurapay a lumablabaan iti awan-res-sat a panangngato ti presyo ti bagas, taraon, langis, sungrod, agas, plete ken nadumaduma a serbisyo. Isuda dagiti inna ken annak a makikaykaysa kadagiti karruba da tapno babalawen ni Marcos ken dagiti pulitiko iti panangbusbos iti kwarta ti umili para iti nabarayuboy a panagbiag da ken tapno supyaten ti saan nga agpatenga a panagutang ti gubyrno tapno pondoan ti korapsyon. Kadagiti kampus, kabilang dagiti babbai nga agtutubo nga agmarmartsa iti sangwanan ti panaglaban iti awan-sarday a panangngato ti matrikula ken magastos iti panagadal, kasta met iti panaglaban iti panagpakaaso-aso ni Marcos iti US ken panangguyod ti pagilian iti imperyalista a gera.

Iti kaaw-awayan, kabilang dagiti babbai iti masa nga agor-organisa ken agtigtignay laban iti rehimen Marcos ken iti patakaran daytoy iti todo a liberalisasyon a mangpatpatay iti pagbiagan ti minilyon a manalon. Karaman isuda iti sangsang-kamaysa nga agpukpukaw para iti pudno a reporma iti daga, ken madagdagus a kiddaw tapno ibaba ti abang ti daga, interes iti pautang ken dagiti agum nga usurero ken bangko ken presyo dagiti ramramit iti panagtalon. Iti mano ribo a barangay a konkontrolen ti militar, natured a babbabalawen da ti panagabusong ken kinaranggag dagiti pasista a soldado, nangruna laban iti babbai ken dagiti ubbing.

Kabilang dagiti babbai iti unaan dagiti agtutubo a baro a Nalabbaga a mannakigubat ti NPA. Kas dagiti im-muna a kaputotan ti babbai a man-nakigubat, ipampamatmat da tatta ti awan patenga a kinamaingel iti panangsangong iti kabusor, ken di-aggi-bus a panagayat ken panangtagiben kadakuada iti masa a kabinnulig da iti tarigagay para iti nawaya ken naranyag a masakbayan.

 Tawen LVI No. 5 Marso 7, 2025	
Ti Ang Bayan ket maipabpablaak iti lenggwahe a Pilipino, Bisaya, Iloko, Hiligaynon, Waray ken Ingles. Agawat ti Ang Bayan kadagiti kontribusyon nga artikulo ken damdamag. Maallukoy met dagiti agbasbasa nga agidanun kadagiti dillaw ken rekomendasyon para iti panagdur-as ti pagiwamak tayo.	
Linaon Editorial: Saan a kumudrep ti rimat dagiti rebolusyonaryo a bitwen1 Editorial: Ited ti kalawaan a suporta iti welga dagiti mangmangged iti Nexperia3 Ti lugar ti babbai ket iti rebolusyon!4 Dagiti protesta5 Sibilyan a mannalon, pinapatay ti 82nd IB5 Tignay dagiti Pilipino iti ballasiw-taaw6 Dagiti adal iti panagrukwas iti EDSA7 Iti ababa a sarita8 Panagsupyat iti ngumatngato a matrikula iti kolehiyo9 Panagtakder para iti masa a Mindoreño10	
Ti Ang Bayan ket ipabpablaak ti Komite Sentral ti Partido Komunista ng Pilipinas dua a daras iti tunggal bulan	
 ang.bayan@cpp.ph	

Itd ti kalawaan a suporta iti welga dagiti mangmangged iti Nexperia

Idi Marso 5, aggigiddan a nagsardeng iti panagtrabaho ti nasurok 1,300 mangmangged iti Nexperia Philippines Inc ken naideklara ti welga iti pabrika daytoy iti Light Industry Science Park 1 idia Cabuyao, Laguna. Panggep daytoy a sangsangkamaysa nga iyabante da ti dangadang para iti umento iti sweldo, panangisubli kadagiti naikkat a mangmangged ken laban iti panagduprak iti unyon da.

Mano tawenen nga an-anusan dagiti mangmangged iti Nexperia ti kapitalista a panangrabngis iti pagimbagan ken saan a panangikaso kadagiti arungaing da. Agintutuleng ti maneydsment ti kumpanya kadagiti kadawatan da para iti makabiag a sweldo, laban iti panagsisante ken kontra kadagiti panagatake iti karbengan da iti panagunyon. Pabor iti interer ti kapitalista, nagiparuk-at ti "assumption of jurisdiction" ti Department of Labor and Employment (DOLE) tapno ipasardeng ti anyaman a plano a welga tapno kano "bumalaet" daytoy.

Ketdi, ididiaya ti kapitalista ti makainsulto nga umento a ₱17 kada aldaw kagiddan ti agsasaruno a panagikkat ti ginasut a mangmangged manipud pay 2023. Tapno agakup ti dumakdakkal a ganansya, dagiti mangmangged ket mapwerpwersa nga agdoble-oras ti panagtrabaho. Idi 2024, nadanon ti kumpanya ti produksyon ti siyam a bilyon nga *electronic chips* nga maar-aramat iti produksyon dagiti lugan, ramit pangkomunikasyon ken dadduma pay. Naaramid daytoy iti panangpwersa kadagiti mangmangged nga agiggem ti agingga ti uppat a makina tunggal maysa, a plano pay a maipangato iti siyam a makina kadagiti umay a panawen.

Saan a mailibak ti istorikal a kinapateg ti welga iti Nexperia. Maysa daytoy kadagiti kadakkalan a welga iti napalabas a mano a tawen iti maysa a gangannaet a kumpanya. Daytoy a welga ket direkta a panangkarit iti patakaran a "no strike" a nairut a maipatpatungpal kadagiti export processing zone. Ipakpakita ti

kinatured dagiti mangmangged ti Nexperia a sibibiag ti pakinakem ti panaglabaan dagiti mangmangged a Pilipino. Ipalpalagip daytoy iti amin a mangmangged ti kinapateg ti panagkaykaysa ken pangngeddeng a lumban tapno salakniban ti pagimbagan ken naindasigan a dignidad da.

Bimtak ti welga dagiti mangmangged iti Nexperia iti tengnga ti kumarkaro a sosyo-ekonomiko a krisis a mangparparigat iti intero a pagilyan. Sarming daytoy ti nalawa a diskuntento ti masa a mangmangged ken umili iti sango ti panagtayok ti presyo ti taraon ken dagiti basaran a pagkasapulan ken serbisyo, nababa a sweldo ken nasaknap a kinaawanpanggedan. Minilyon ti maag-agawan ti daga ken pagbiagan ken ilugluges dagiti gangannaet a kapitalista, lokal a dadakkel a negosyo ken apo't daga. Ngarud, ti welga dagiti mangmangged iti Nexperia ket mangmangted boses saan laeng kadagiti mangmangged ti Nexperia, nu di ket iti intero nga umili nga agsagsagaba iti sidong dagiti parigat ken maka-gangannaet a patakaran ti rehimen US-Marcos.

Ipampamatmat dagiti mangmangged iti Nexperia ti tured ken militansya iti dangadang. Panpaneknekan da a saanda nga agrukma iti sango ti panaglipit, pammutbuteng ken panagranggas ti kapitalista ken ti reaksyunaryo nga estado. Gapu ta iggem da ti kalintegan ken hustisya, saan da a nagpakigtot iti nadumaduma a panaglipit ken panagpangta ti kapitalista nga isuda ket mapadisi wenno makasuan. Mangad-adaw da ti pigsa ken tibker ti pakinakem iti tunggal maysa, iti panagkikinnapet da iti

panagsango iti buklis a kapitalista.

Rumbeng laeng nga agpanawagan iti amin a mangmangged ken intero nga umili a tumakder ken suportaran ti welga dagiti mangmangged ti Nexperia. Panawen daytoy ti panagkaykaysa dagiti mangmangged, sadinno man ti pakaibilangan da a pederasyon wenno linya ti industriya. Nasken nga ipakaammo kadagiti mangmangged, karaman dagiti adda iti empresa kadagiti *export processing zone*, a ti dangadang dagiti mangmangged iti Nexperia ket dangadang da met. Ti dangadang para iti makabiag a sweldo, makatao a kundisyon iti trabaho ken karbengan iti panag-union ket kolektibo a laban ti amin a mangmangged a Pilipino, uray dagiti mangmangged iti nadumaduma a paset ti lubong.

Kasapulan met a mangted ti suporta iti welga dagiti mangmangged ti Nexperia ti nadumaduma a sektor. Rumbeng nga awiten dagiti isyu da iti kaadwan a kampus, komunidad, upisina ken simbaan, tapno alaen ti ti nalawa a suporta ti intero nga umili. Urnongen ti kalawaan a suporta a materyal ken moral para kadagiti mangmangged ti Nexperia. Ti balligi ti welga da ket sigurado nga agserbi nga inspirasyon tapno riingen dagiti mangmangged ken nadumaduma a dasig ken sektor a tumakder ken lumaban iti panangidadanes ken panaggundaway.

Bayat a padpadayawn tayo ti tured dagiti mangmangged ti Nexperia iti militante a panangiyabante kadagiti demokratiko a kadawatan ken interer da, rumbeng met a silawan tayo ti dana ti nalawlaw a dangadang laban iti amin a langa ti panangidadanes iti masa nga anakling-et ken intero nga umili. Ipakita tayo nu kasano a ti dangadang dagiti mangmangged ti Nexperia ket nakasilpo iti kabuklan a rebolusyonaryo a dangadang tapno gibusan ti bulok ken mangidadanes a sistema.

Makidangadang tapno agbiag!

Gapu ta pakyawan iti plantasyon ken kakapyan, agtitinnulong iti panagburas ti kape ti pamilya a Lupao. Kasapulan a napaspas a leppasen ni Lydia, ti asawa ken tallo nga anak da ti 7-ektarya a kakapyan. Sangsangwen ni Lydia ti pangta a maikkat isuna iti listaan ti 4Ps nu saan na nga isubli iti eskwelaan dagiti annak na a katinnulong na iti pagbiagan.

Balbaliw met a pagap-aplayen ti kumpanya a sumsumrekan ni Tess isuna iti dandani dua a tawen kas modista. Daytoy ti sungbat ti mandedyer kenkuana kalpasan a dimmawat ti *maternity leave* para iti panaganak na iti sumaruno a bulan. Palalo ti danag ni Tess a maawanan isuna ti panggedan, nangruna ta agbalin isuna a solo a nagannak.

Napueran met da Rosario, ina ti 6-tawen nga ubing ken 1-tawen a maladaga. Ti panagbuya dagiti kameng ti timpuyog da a nakurapay, ti puor ket naigagara tapno pagtala-wen isuda iti komunidad. Agbibigang laeng ti pamilya na iti nakabasbassit a sapul ti asawa na nga agpaspasada ti pedikab. Nakapaing da iti *evacuation center* a malaylayus tunggal agbagyo.

Maysa a masahista ni Kris, maysa a *transgender* iti maysa a bassit nga *spa*. Iti trabaho na a makaibus ti pigsas, awan iti minimum a sweldo ti suma total ti kumisyon nga ipaspasweldo ti amo na. Bagi na ti babayadan iti SSS ken Philhealth. Awan ti mait-ited a proteksyon kenkuana uray mano a daras a nagdanag isuna kadagiti kliyente a dumawdawat ti "espesyal a serbisyo."

Daytoy ti nadumaduma a rupa ti babbai a Pilipino. Saan a mailibak ti kinakaro ti sagsagabaenda a rigat ken sakripisyo. Awan pannakabanog nga agrabtrabaho da tapno mailasat ti pamilya da ngem mayorya kadakuada ket maibilbilang a "saan a produktibo." Nasurok kagudwa iti babbai ket saan a maibilbilang iti "pwera ti tegged." Adda dagiti linteg ken programa para iti babbai a napintas a denggen ngem dagitoy ket awanan ngipen ken awan mamaya na iti sango ti nasaknap a pana-

ngirurumen kada-kuada.

Iti intero a lubong, dagiti babbai ket makapdpadas ti doble a pannakaidananes iti sango ti nasaknap a disempleyo ken nababa a sweldo. Ad-adu dagiti babbai nga awanan panggedan. Umaw-awat da ti nababbaba a sweldo kumpara kadagiti lallaki a mangmangged. Ad-adda a makaperdi ti basnut kadakuada ti didigra ti *climate change* ken dagiti gubat. Kumarkaro ti mapadpadasan da a kinaranggas iti *human trafficking*, pornograpiya, prostitusyon, panaglako ti ubbing, kabilang dagiti dumaldalan iti *social media* ken dadduma pay.

Ti mapadpadasan a pannakaidananes dagiti babbai ket nakarkaro pay iti sidong ti malakolonyal ken malapyudal a sistema. Nakaituon iti pundamental a parikut ti imperyalismo, pyudalismo ken burukrata kapitalismo, nayon a sangsangwen dagiti babbai a Pilipino ti nadumaduma a porma ti pyudal ken burges a patriyarkal a sistema.

Iti sango ti umag-agibas a krisis iti ekonomya, pulitika ken kultura, sadinno koma ti ayan dagiti babbai? Iti tengnga ken unaan ti panangiyabante ti rebolusyon a pudno a mangbaliw iti kasasaad da a magungundawayan ken maidadan. Daytoy ti pinanekekan ti mano a dekada a praktika ti rebolusyonaryo a tignay ti babbai iti Pilipinas iti panangiyuna ti Makabayang Kilusan ng Bagong Kababaihan (Makibaka) a tartarabayan ti Communist Party of the Philippines (CPP). Inpakita ti Makibaka a kabilang iti intar ti rebolusyon ti babbai, karamanen dagiti LGBTQ ken



uray dagiti ubbing.

Iti kaaw-awayan, dagiti organo ti bileg iti pulitika ket maitaktakder a nairut a kabinnadang dagiti babbai babaen dagiti lokal a balangay ti Makibaka. Saan a matawaran a ti panagabante ti papel ti babbai a mannalon iti pulitika, awit daytoy dagiti pang-ekonomya a ganansya dagiti bayanihan, timpuyog iti pagtatalonan ken dagiti kooperatiba. Uray iti aspeto a kultural ket paspasaknapen daytoy ti demokratisasyon iti uneg ti pamilya, maka-masa a panag-agas ken panagpatignay kadagiti ubbing para iti alternatibo a kultura ken edukasyon.

Iti kasyudadan, iyab-abante ti Makibaka ti panangirupir kadagiti demokratiko a kadawatan, pagimbagan ken karbengan ti babbai, ubbing ken LGBTQ iti tignay masa. Sipipinget nga ibunbunannag ken lablabanan da ti kinabulok, kinainutil ken pasismo ti agar-ari a sistema gapu iti napasnek a panagibinglay ti tignay ti babbai kadagiti pabrika, pagadalan, komunidad, upisina, simbaan ken nu sadinno pay a lugar nga ayan da. Ibingbinglay da ti timek da iti pukkaw ti umili para iti nailyan a wayawaya manipud iti gangannaet a turay ken panangidadanes.

Kayat ti imperyalismo a US a lapdan ti pannakipaset ti babbai iti rebolusyon ken rimbawan ti kapanunotan a palaban ti tignay ti babbai. Babaen kadagiti instrumento a USA-

Suruten iti panid 5



Walk-out iti UP Baguio. Agarup 1,200 nga estudyante, manursuro ken empleyado ti University of the Philippines (UP)-Baguio ti timmabuno iti naiyaramid a *walk-out* idi Pebrero 26 para iti nangato a pondo iti edukasyon, *transparency* iti badyet ken sungsubatan ti administrasyon. Kadakkelan daytoy a demonstrasyon iti napalabas a mano a tawen iti UP Baguio. Iti panangiyuna ti Alliance of Concerned Students (ACS), binabalaw da ti saan nga umno a panagaramat ti pondo ti unibersidad a naibunannag idi Disyembre 2024 iti Commission on Audit 2023 Annual Audit Report.

Sala-protesta ti babbai. Adda iti 1,000 babbai a mangmangged ti Southern Tagalog ti nagtitipon idiy Laguna tapno isayangkat ti sala-protesta a paset ti tignay One Billion Rising idi Marso 2. Ti aktibidad ket inyuna ti Women Workers United (WWU) a nagpanawagan para iti pananggibus ti kinaranggas iti lugar ti pagtrabahuan, panangingato ti sweldo iti makabiag a tukad, regular ken disente a trabaho, akses iti pangpubliko a serbisyo ken karbengan dagiti mangmangged nga agunyon.

30 tawen ti Philippine Mining Act. Nagprotesta iti sakaanan ti Mendiola idiy Manila dagiti grupo a makakalikasan iti sidong ti Kalikasan PNE ken dadduma pay a progresibo a grupo tapno ipanawagan ti panangibasura iti Philippine Mining Act of 1995 iti mai-ka-30 tawen daytoy idi Marso 3. Awit dagiti nagprotesta ti maysa a mapa ti Pilipinas a mangipakpakita nu sadinno dagiti kadadakkelan a minasan iti pagilyan ken dagiti dinastiya iti pulitika nga agtagikua kadagitoy.

Bagi tayo ti 15-kilometro. Agkaykaysa ti nasurok 100 mangngalap, akademiko, dagiti estudyante ken tao't-simbaan ti Iloilo iti panangbukel ti alyansa nga Aton ang Kinse Kilometro idi Marso 3 tapno irupir ti karbengan ti babassit a mangngalap iti 15-kilometro a *municipal water*. Dimmay-ay iti taripnong dagiti kameng ti Pamalakaya manipud iti Panay.

Sibilyan a mannalon, pinapatay ti 82nd IB idiy Capiz iti peke nga engkwentro

PINAPATAY ITI PAMMALTOG dagiti tropa ti 82nd IB ti mannalon a ni Peter Agudes, mabigbig met a "Tito," idiy Barangay Minan, Tapaz, Capiz idi Pebrero 26. Dua pay a kadwa na ti nasugatan. Parparwaren ti Armed Forces of the Philippines (AFP) a ni Agudes ket napatay iti armado nga engkwentro iti baet dagiti soldado ken ti New People's Army (NPA).

Inpetteng ni Perla Agudes, asawa ti biktima a saan a Nalabbaga a mannakigubat ti tallo. Hustisya ken patas nga imbestigasyon ti panawagan ti pamilya. Ti pamilya Agudes ket agindeg iti Sityo Taroytoy, Barangay Manica, Libacao, Aklan. Naulila ni Peter ti tallo nga annak na nga edad 10, 13 ken 16.

Masaker. Awanan-asi a minasaker dagiti soldado ti 26th IB ti pamilya a Toto Gomansil, Toni Gomansil ken ti anak da a ni Celine Gomansil idiy Dayuman River, Barangay San Vicente, Esperanza, Agusan Del Sur idi Disyembre 15, 2024. Mano a bulan kalpasan ti nakadandangkes a krimen ket awan pay laeng ti hustisya ken napagsungbat iti masaker.

Sakbay ti krimen, nagpakada pay ti pamilya Gomansil kadagiti soldado a nakadeploy iti asideg a detatsment tapno agrabaho iti talon da. Iti laksid ti panagpakada da, sinurot isuda dagiti soldado ken ingalut da ti agassawa a Toto ken Toni. Inpasidong da dagitoy iti nairut nga interogasyon sakbay a tinagbat ken pinatay da dagitoy. Ni Celine ket pinaltopaltog dagiti soldado idi timmaray. Inakusaran da dagitoy a makisil-silpo iti NPA ken rebolusyonaryo a tignay iti prubinsiya.

Terorismo iti tangatang. Troma ken buteng ti intunda ti istraping dagiti helikopter ti militar kadagiti barangay ti La Paz, Agusan del Sur ken Cabanglasan, Bukidnon idi Marso 4. Iti rason a daytoy ket suporta iti panag-atake ti AFP laban iti hukbo ti umili, sidudursok a nagpaltopaltog dagiti helikopter a nakaapektar kadagiti sibilyan. Nagipatulod met dagiti soldado ti FA50 *fighter jets* a nagkarga kadagiti bomba a 250-lb wenno 500-lb a maaramat koma ngem napaatras dagitoy idi napukaw ti maysa kadagiti tallo a *jet fighter*.

Manipud iti panid 4

ID, World Bank, Asian Development Bank, United Nations ken dadduma pay, ar-aramaten ken idurduron da dagiti programa nga agar-aramat kadagiti makaay-ayo a sarita nga "inclusion," "safe spaces," ken "peace zones para kadagiti ubbing." Panggep dagitoy nga "adbokasiya" a pali-begen ti saritaan ti nailyan a panangidadanes ken naindasigan a panag-gundaway kas ramut ti mapadpadasan a pannakaidadanes dagiti babbai, iyadayo isuda iti rebolusyonaryo a dana ti panagbalbaliw ken itunda isuda iti dana ti repormismo, ligalismo ken NGOismo.

Iti sango daytoy, kasapulan nga ad-adda nga ipakita iti nalawa a masa ti babbai, a ti pannakawayawaya da manipud iti pannakaidadanes ket magun-od laeng iti tay-ak ti armado a dangadang. Iti napalabas a mano a dekada, dinalyasat ti babbai a Pilipino ti dana ti armado a rebolusyon, ken nangibinglay ti sirib ken biag kas Nalabbaga a mannakigubat ken kumander ti New People's Army ken kas lider ken kadre ti Partido.

Kas kada Lydia, Tess, Rosario ken Kris, agur-uray ti nalawa nga intar ti babbai nga ikutan ti lugar da iti rebolusyon. Ad-adda a napateg tatta iti babbai, nangruna dagiti babbai nga anakling-et, nga agpursigi iti panagriing, panag-organisa ken pannakidangadang. Nasken a nairut a petpetan dagiti prinsipyo ti rebolusyonaryo a tignay ti babbai ken itagay ti bandera ti nailyan-demokratiko a tignay.

AB

Panangpapigsa iti tignay dagiti kailyan a Pilipino iti ballasiw-taaw

Naguurnong itay nabiit ti manopulo a kamkameng ti Compatriots tapno isayangkat ti istorikal a kumperensya ti tignay ti migrante a Pilipino. Ibagbagi ti rebolusyonaryo a timpuyog a Compatriots ti espesyal a sektor dagiti migrante a Pilipino iti National Democratic Front of the Philippines.

Iti balangkas ti tignay panagilinteg, pinasingkedan ti Compatriots ti rebbengen daytoy nga organisasyon ken patignayen dagiti kailyan a Pilipino iti nailyan-demokratiko a rebolusyon, sadinno man ti ayanda a paset ti lubong. Dumandanon iti 15 milyon ti migrante a Pilipino, kabilang ti minilyon a temporaryo a mangmangged iti nababa a klase ti trabaho. Manipud 2023, dumanon iti agarup 10,000 a Pilipino ti inal-daw a rumrumwar iti pagilyan gapu iti kinakirang ti lokal a trabaho, kinaawan wenno agkurkurang a sapul ken nakababbaba a sweldo, panagkamkam ti daga ken pagbiagan. Babaen ti patakaran iti panag-eksport iti tegged, isuda ket isaksakripisyo ti reaksyunaryo nga estado tapno kissayan ti krisis iti empleyo iti pagilyan. Isuda ket makikkikilang ti minilmilyon iti langa dagiti singir iti basaran a serbisyo a saan da met a malaklak-am.

Kadagiti gangannaet a pagilyan, sagsagabaen da ti panag-abuso, panaglabsing kadagiti karbengan da iti tegged, rasismo wenno diskriminasyon iti puli, kinaranggas ken nangatngato a gastos iti migrasyon. Awan ti proteksyon da, nangruna dagiti babbai a mangmangged nga adda kadagiti trabaho a pinakabulnerable iti abuso ken krimen.

Inadal ti Compatriots ti panagsuma iti nasurok uppatt a dekada a rebolusyonaryo a trabaho iti intar dagiti migrante ken immadaw da kadagiti adal iti nabaknang a kapadasan manipud kadagitoy. Sinublian da da-

giti adal ti umuna ken maikadwa a naindaklan a tignay panagilinteg tapno ilugar ti panawagan ti agdama a tignay panagilinteg laban iti suhetibismo, konserbatismo, ultra-demokrasya ken burukratismo.

Napagadalan met iti kumperensya dagiti resulta ti panagsukisok iti gimong ken panagamiris iti dasig (SICA wenno *social investigation and class analysis*) nga insagana dagiti komite daytoy iti nadumaduma a pagilyan ken kontinente. Babaen kadagiti SICA, nasungbatan ken nailawag ti Compatriots dagiti madagdagus a saludsod kanaig iti sektor ken naikeddeng dagiti patakaran iti panagpalawa ken panag-organisa da.

Tapno iyabante ti interes dagiti Pilipino a migrante, tinalmegan ti Compatriots ti pagkasapulan a bukten dagiti organisasyon iti intar da tapno iyabante dagiti demokratiko a karbengan da, kabilang ti karbengan iti trabaho ken dagiti proteksyon a panggimong kadagiti pagilyan a pagtrababahuan da. Sinigurado met daytoy ti panag-organisa kadagiti limed nga organisasyon ti masa nga agserbi a kabinnadang ti Partido iti panangidaulo iti tignay migrante, panangpapigsa ti tignay ti

migrante a mangmangged a Pilipino ken nalawa a multisektoral a patriyotiko a tignay masa dagiti Pilipino iti nadumaduma a pagilyan. Tannawagan ti Compatriots nga iti panagpapigsa dagitoy a tignay, dumakkel pay ti maibinglay daytoy iti anti-imperyalista a pannakikinnabsat, kasta met iti panangiyabante ti internasyunal a proletaryado a rebolusyon.

Nairut a nakasilpo iti kasasaad dagiti migrante ti usapin a sangsangwen ti umili iti Pilipinas, kas ti barat a sweldo dagiti mangmangged ken kinaawan ti daga, kinarinuker dagiti burukrata-kapitalista nga agar-ari iti estado ken panangsallukob ti imperyalismo a US iti gimong a Pilipino. Nu pagpilyen, kaykayat da nga agtalinaed iti pagilyan a kadwa dagiti ipatpateg da iti biag. Bayat nga adda da iti ruar ti pagilyan, ultimo a tarigagay da a makawid iti ina a pagilyan.

Kas Pilipino, mabigbig dagiti migrante kas paset ti nailyan a tignay mamagwayawaya. Ti solusyon iti migrasyon da ket ti panangiyabante ti nailyan demokratiko a rebolusyon. Karit iti Compatriots ti panagpapigsa ti tignay laban iti managgundaway ken mangidadanes nga aso-aso a reaksyunaryo nga estado iti Pilipinas ken panagpalawa iti suporta iti naunday a gubat ti umili iti tengnga ti kumarkaro a pasismo iti sangalubongan.

Tantannawagan ti Partido ken ti umili a Pilipino ti aduan a panagawid dagiti migrante iti Pilipinas tapno maki-paset iti rebolusyonaryo a tignay iti Pilipinas, nangruna iti tay-ak ti armado a dangadang, para iti panangpanday ti gimong a pudno a nawaya, demokratiko ken nasaliwanwan. AB



Pangiggeman dagiti adal iti panagrukwas iti EDSA

Iti okasyon ti maika-39 anibersaryo ti panagrukwas iti EDSA, nagpalagip ti National Democratic Front of the Philippines iti napapateg nga adal ken iti pagkasapulan a pagbalinen a naan-anay dagiti nagun-od daytoy babaen ti panangiyabante iti nailyan-demokratiko a rebolusyon ti umili.

Binigbig ni Elias Dipasupil, kabuklan a kalihim ti NDFP, ti naisang-sangayan a papel ti panagrukwas iti EDSA iti pakasaritaan ti umili a Pilipino. Binukel daytoy ti panagkaykaysa ti nadumaduma a grupo, manipud iti sinsero agingga iti addaan bukod nga adyenda, tapno padisien ti maysa a diktador. Ti kinalawa ken nagdudumaan dagiti pwersa ti nangpalapad ken nangpapiaksa ditoy, ngem daytoy met laeng ti makagapu nu apay a nagbalin a bulnerable ti nagtungpalaan ti panagrukwas iti distorsyon ken kooptasyon.

Kalpasan ti umadani uppat a dekada, agtaltalinaed a nakalumlom iti kinarigat ti pagilyan, pagar-arian dagiti burukrata kapitalista ken dagiti amo da nga imperyalista. Nakasublin iti Malacañang ti pamilya a Marcos ken sipapangas nga agturturay. Daytoy napalabas a dua a tawen laeng, siyam a kaso kanaig iti tinakaw da a kinabaknang ti naibasura iti Sandiganbayan. Nanayunan metten ti naurnong da a pondo ti umili iti langa ti *intelligence and confidential funds*, *unprogrammed funds*, Maharlika Investment Fund ken adu pay a kapada a pagayusan ti korapsyon.

Nupay kasta, agtaltalinaed a

napateg ti panagrukwas iti EDSA ken dagiti adal ditoy iti pananglaban iti tiranya. Ti panagrukwas ket napateg a palagip iti pagkasapulan ti naanep a panagriing ken panag-organisa. Saan a napadisi ti diktador iti tallo nga aldaw laeng idi 1986. Iti 14 tawen sakbay daytoy, naipundar iti kasyudadan dagiti limed nga organisasyon agingga a kinabaelan ti umili nga agisayangkat ti dumakdakkal a naparang a tignay tapno buraken ti terorista nga alyaw. Iti kaaw-awayan, insayangkat ti New People's Army ti armado a dangadang tapno labanan ti nakaro a militarisasyon, kagiddan dagiti dangadang ti manalon tapno iyabante ti dawdawaten da a pudno a reporma iti daga.

Kangrunaan ti amin, napateg nga adal ti pagkasapulan a kumpletuen ti kapadasan ti panagrukwas iti EDSA laban iti tiranya agingga a magun-od ti rebolusyonaryo a panagbalbaliw ken panangbukel ti maysa a pudno a demokratiko a gubyrno ti umili a tartarigagayan ti umili.

Panangisabiag iti anag ti EDSA

Idi Pebrero 25, iti mismo nga anibersaryo ti panagrukwas iti EDSA, naguummong ti 10,000 iti saakaan ti Our Lady of EDSA shrine iti

Mandaluyong City idia Metro Manila. Ditoy nga ummong ket nagtitipon dagiti pwersa ti Tama Na Alliance, Bagong Alyansang Makabayan, One Taft Alliance, Duterte Panagutin Network, dagiti estudyante, mangmangged, tao't simbaan ken adu pay.

Nagkaykaysa da tapno nainget nga ipadanon iti rehimen Marcos ti panawagan da laban iti korapsyon ken panaglablabes. Kasta met nga inpanawagan da ti madagdagus a panangpadisi ken Sara Duterte, ti bise-presidente ni Ferdinand Marcos Jr.

Naangay ti kapada a protesta kadagiti syudad ti Baguio, Tuguegarao, Naga, Bacolod, Iloilo, Roxas, Capiz, Cebu ken Davao a dinar-ayan dagiti kamkameng ti lokal nga organisasyon iti sidong ti Bayan ken progresibo a partido kas ti Bayan Muna ken Kabataan Partylist.

Nasurok 70 a pagadalan ti nagdeklara nga awan ti serrek tapno maikkan gundaway dagiti estudyante, manursuro ken dagiti akademiko a dumar-ay iti nadumaduma nga aktibidad iti pananglagip iti panagrukwas.

Idia Metro Manila, ginasut nga estudyante ti nag-walk-out kadagiti klase da, karaman dagiti agad-adal ti Polytechnic University of the Philippines.

Nag-walk-out met dagiti estudyante ti UP-Los Baños ken Cavite State University, bayat naangay ti taripnong iti uneg ti Southern Luzon State University idia Lucban, Quezon ken Bulacan State University. Idia Visayas, napasamak ti walk-out idia UP-Tacloban ken tignay iti University of Eastern Philippines idia Catarman, Samar.

Idia Mindanao, naangay ti taripnong iti uneg ti kampus ti Ateneo de Davao University, Ateneo de Zamboanga University ken Xavier University idia Cagayan de Oro City.



60

mining permit

a sumaksakop iti 188,199.45 ektarya a daga idia y Northern Luzon ti inted ti estado iti nadumaduma a kumpanya ti minas manipud idi naaramid a linteg ti managdadael a **Philippine Mining Act of 1995**.

16%

laeng ti kabuklan a gatad a maal-ala manipud iti panagminas ti mapmapan iti estado iti langa ti buwis ken *shares*.

25

iti 755 **detenido a pulitikal** ket unyonista ken organisador dagiti mangmangged. Napilaan da kadagiti pinarbo a kaso ken naibalud gapu iti panangilaban da iti karbengan iti tegged.

Nagtaudan: *Free Our Unionist Network*

50%-60%

ti **diskwento iti plete** dagiti estudyante, senior citizen ken addaan rangkap ti maipabpabaklay kadagiti drayber ti Grab ken dadduma pay a kapada a kumpanya iti transportasyon. Dakkel a kissay daytoy iti bassit a sapul dagiti drayber.

Nagtaudan: *Malayang TNVS Movement*

₱29/aldaw

ti barya a nayan a sweldo nga inaprubaran ti *wage board* ti Davao Region idi Pebrero 17, a nagingato iti minimum a sweldo agturong iti ₱505-₱510/aldaw, awan pay iti kagudwa iti ₱1,190 makabiag a sweldo iti rehiyon idi Enero.

₱4.42 B

ti maipan a puonan manipud iti **Maharlika Investment Fund** iti Makilala Mining Company, maysa a kumpanya nga addaan managdadael nga operasyon idia y Kalinga.

100,000

nagrali idia y South Korea idi Marso 1 tapno irupir ti *impeachment* iti presidente ti pagilyan a ni Yoon Seuk Yul ken para iti reunipikasyon ti dua a Korea (North ken South). Ti Marso 1 ket panaglagip iti patriyotiko a tignay ti umili a Koreano laban iti okupasyon ti Japan.

₱4/kilo

ti presyo ti ginnatangan ti **kamatis** iti **Nueva Ecija** idi Pebrero a nakalugian dagiti mannalon ken ad-adda a nangilumlom kadakuada iti utang.



Kolektibo a panagsupyat iti ngumatngato a matrikula iti kolehiyo

Nagkaykaysa a timmakder ti adu a konseho ti estudyante, dagiti publika-syon ken organisasyon manipud iti nadumaduma a pribado a kolehiyo ken unibersidad laban iti plano a panangingato ti singir iti matrikula ken dadduma pay a babayadan (Tuition and Other Fees Increase o TOFI) para iti tawen 2025-2026. Iti maudi a rekord ti National Union of Students of the Philippines (NUSP), bimmut iti 2% agingga 10% ti tantos ti gakat a panangngato iti singir dagiti unibersidad para iti sumaruno nga akademiko a tawen.

Tinawen, tunggal Pebrero, umaw-awat ti Commission on Higher Education (CHED) kadagiti petisyon para iti gakat a TOFI. Daytoy a "kar-bengan" tapno agingato ti singir ket umannurot iti CHED Memorandum Order No. 03 Series of 2012. Paset daytoy ti panangiyaramid ti "konsultasyon" kadagiti estudyante tapno maipalawag ti panggep ti TOFI.

Nupay kasta, pammarang dagitoy a konsultasyon, umannurot iti kapad-dasan dagiti konseho ken estudyante. Iti kaunggan na, maar-aramat dagitoy tapno idungpar ti TOFI. Iti dadduma pay a gundaway, agdadata a saan nga ikaskaso ti administrasyon uray ti inkeddeng a proseso ti CHED.

Kadawyan nga irasrason iti panangingato ti matrikula ti panagngato ti presyo dagiti gagatangen, panagngato ti sweldo dagiti manursuro ken dadduma nga empleyado ken pa-

nangpadur-as kadagiti pasilidad ken serbisyo. Segun iti NUSP, gasgasen dagitoy a rason gapu ta nalawag a ti panagngato ti matrikula ken dadduma a babayadan ket para iti panagipangato ti pastrek. Iti napalabas, awan met ti nagbaliw kadagiti pasilidad, kasasaad kadagiti manursuro ken empleyado kadagiti unibersidad.

Nainkalinteg a panagsupyat

Adda iti abereyds a ₱130,000 ti kasapulan tunggal tawen tapno makaadal ti maysa a nga estudyante iti kolehiyo. Saan nga umanay uray ipan ditoy ti makatawen a sapul (₱120,000) ti kadawyan a mangmangged nga agsusweldo ti minimum. Adda dagiti patta-patta a dumandanon iti ₱2 milyon ti kasapulan a magastos tapno makaturpos iti maysa a 4-tawen a kurso iti kolehiyo kadagiti mayor nga unibersidad ti

pagilyan.

Iti sango ti ad-adda pay a ngumatngato a presyo ti basaran a gagatangen, nainkalinteg a labanan dagiti estudyante ti nayon a matrikula. Iti napalabas a bulbulan, nagisayangkat da kadagiti porum, miting, rali ken dadduma pay a tipo ti aktibidad tapno iyebkas ti panagsupyat ditoy.

Naangay dagiti tignay iti University of the East (5% TOFI), De La Salle University (3%), University of Santo Tomas, Ateneo de Manila University (6%), Adamson University (5%) ken dadduma pay nga unibersidad iti Metro Manila.

Iti Saint Louis University idia Baguio City nga umuna a naisingasing ti 9% a panagngato, naiduron ti tignay dagiti estudyante nga ibaba daytoy iti 6.25%. "Maysa a balligi ti panagpababa iti TOFI, ngem ti 6.25% ket agtaltalinaed a parigat iti rinibo a baro nga [estudyante]. Ituloy tayo ti laban," segun iti grupo a Walang Iwanan Louisian Network.

Iti Holy Angel University idia Pampanga, agpangpangta ti 3.5% a panagngato. Iti sarbey ti pagiwarnak a The Angelite, tallo iti tunggal uppat nga estudyante ti saan nga umanamong iti anyaman a TOFI para iti sumaruno a tawen, ken nasurok 60 porsyento ti addaan posibilidad a sumardeng nga agadal gapu iti TOFI. Maikatlo a nayon a singir daytoyen iti uneg ti tallo a tawen.

Tuloy-tuloy pay ti konsultasyon ti NUSP kadagiti konseho dagiti estudyante kadagiti unibersidad a posible nga agipangato ti matrikula. Pappapigsaen da ti panagkaykaysa dagiti konseho ken estudyante iti intero a pagilyan tapno ad-adda pay a palataken ti laban kontra iti panagngato ti matrikula ken dadduma pay a babayadan. Pagsungsungbaten da ti CHED ken rehimen Marcos iti panangpabor daytoy iti pribado a negosyo nga ad-adda pay a nagganansya iti pakaperdian dagiti agtutubo a Pilipino ken ti edukasyon da.

2025-2026

DAGITI UNIBERSIDAD
NGA ADDAAN PLANO
ITI PANANGINGATO
TI SINGIR ITI
MATRIKULA

2% MAPÚA
UNIVERSITY

5-6.25%

UNIVERSITY OF
ST. LA SALLE

UNIVERSITY OF
SANTO TOMAS

UNIVERSITY OF
SANTO TOMAS

University of Saint La Salle (Bacolod City)
De La Salle Araneta University
Saint Louis University (Baguio City)

3-4.5%

CENTRO ESCOLAR UNIVERSITY

NATIONAL TEACHERS' COLLEGE

COLUMBIAN COLLEGE

PHILIPPINE WOMEN'S UNIVERSITY

ATENEO DE NAGA UNIVERSITY

ATENEO DE DAVAO UNIVERSITY

ATENEO DE ZAMBOANGA

XAVIER UNIVERSITY-ATENEO DE CAGAYAN

7-10%

SAINT PAUL UNIVERSITY QUEZON CITY

COLEGIO DE SAN JUAN DE LETRAN

UNIVERSITY OF THE CORDILLERAS

ANG BAYAN Marso 7, 2025

9

Panagtakder para iti masa a Mindoreño

Natured a sinaranget ti nadumaduma a grupo, kabilang ti Karapatan-Southern Tagalog, ti sangon-sango a panaglipit ken militar a kinaranggas ti 203rd IBde tapno maiyaramid ti maysa a *fact-finding mission* (FFM) iti isla ti Mindoro idi Pebrero 23 agingga Marso 1.

Panggep ti tim nga ammuken ti kasasaad ti masa a Mangyan ken mannalon a saksakloten ti militarisation ken terorista a panagari ti militar. Saan a bumaba iti 10 a batalyon a pangkombat ti militar ti nakapakat idia y Mindoro para iti kampanya a "kontra-insurhensya." Iti imbestigasyon da, naimaldit met ti nadumaduma a panaglabsing ti militar iti internasyunal a makatao a linteg, a mangmangted proteksyon kadagiti sibilyan kadagiti lugar nga adda ti armado a risiris.

Partikular a tinurong ti tim dagiti ili ti Pola, Bulalacao ken Mansalay idia y Oriental Mindoro nu sadinno a naiyulat ti serye dagiti panaglabsing iti karbengan-tao kasaruno dagiti engkwentro ti 203rd IBde iti New People's Army (NPA)-Mindoro idi Pebrero. Apagsangpet pay laeng ti tim iti isla, nakapatawen ti saan a deklarado a linteg militar kadagiti barangay.

Idia y Pola, hinarang ken saan a napalubosan a makastrek ti tim iti tallo a nabulabog a barangay. Pinarwar dagiti upisyal a nasayaat ti kasasaad ti komunidad. Ngem iti pannakiuman kadagiti residente, naamuan ti tim ti riribuk nga intunda kadakuada dagiti inyaramid dagiti militar nga istraping manipud iti ere kalpasan ti 3-oras a sinnukat ti putok. Gapu ditoy, naiduron da nga agbakwit. Maysa nga ina ken ti 3-bulan a maladaga na ti palalo a natroma.

Kalpasan ti insidente, miniting ti militar dagiti upisyal ti barangay tapno ipatungpal ti *lockdown* kadagiti komunidad. Nagiyatnag da ti *curfew* ken panagrikisa, ken nagpangta da a makasuan dagiti saan a sumurot iti mandar.

Inaramid a baraks dagiti soldado ti eskwelaan iti komunidad ken

nagitakder da kadagiti tsekpoynt. Adda dagiti mannalon ti niyog nga iligal nga inaresto ken inakusaran da a Nalabbaga a mannakigubat. Napilitan dagiti soldado a ruk-atan isuda kalpasan a mapaneknekan a residente da iti lugar. Dakkel ti nalugi kadagiti agkopkopras gapu ta maparparitan wenno mabuteng da a mangged. Nangato pay koma ti panagatang ti kopras. Uray dagiti resort ket naparitan nga umawat kadagiti turista. Kabayatan na, makalawas nga awan serrek kadagiti eskwelaan iti dua a barangay.

Reklamo dagiti residente, iti mano nga aldaw a panagir-irut dagiti soldado ket awan man laeng ti naawat da nga anyaman a kumpensasyon wenno tulong manipud iti estado.

Kapada a sitwasyon met ti naamuan ti tim iti dua a barangay idia y Bulalacao. Kagiddan ti pannakiuman kadagiti residente, nagiwaras da kadagiti polyeto nga aglalaon ti kasasaad ti karbengan-tao iti isla ti Mindoro.

Nagisayangkat ti tim ti Basic Human Rights Orientation kadagiti katutubo a Mangyan-Hanunuo tapno ipakaammo dagiti basaran a karbengan da ken masalakniban ti bagbagi da iti panawen ti panangrribuk ti militar.

Idia y Mansalay, na-kauman met ti tim dagiti residente ti maysa kadagiti apektado a barangay. Sakbay a panawan

da ti isla, nagiyaramid ti tim ti *candle lighting* ken panangisagut ti kararag iti maysa a simbaan idia y Calapan.

Iti kangitingitan ti FFM, hinaras ken sinaktan ti dua nga ahente a paniktik ti militar ti tallo a kabilang iti tim bayat nga agin-inana da. Ginuyod da ti takyag ti maysa bayat a linayatan da ti dua ken ginandat pay a barsaken ti dua nga ahente ti tim. Iti intero a panawen, awan-sarday ti panagtiktik kadakuada dagiti ahente ti militar.

Iti sango dagitoy a pannubok, balligi a nakapag-ulat ti FFM iti publiko iti resulta ti imbestigasyon da idi Marso 5 idia y Quezon City. Inkari ti tim nga agsubli da iti isla ti Mindoro iti sumaruno pay a gundaway tapno ituloy ti panangsalaknib iti karbengan ti masa a Mindoreño.

Iti mismo nga aldaw ti ipapanaw da idi Marso 1, naiyulat ti baro a serye ti *aerial strafing* ken panagbomba ti 203rd IBde idia y Mansalay, Oriental Mindoro. Iti ulat dagiti residente, dua a daras a nagpatudo ti bala ti dua nga helikopter a Blackhawk iti tallo nga agkakaabay a sityo iti Barangay Panaytayan. Nangitunda daytoy ti baro a riribuk kadagiti sibilyan. Pinaglibakan ti lokal a yunit ti New People's Army nga adda ti natamaan a yunit da iti lugar a pinatuduan ti bala ti militar. **AB**

